

ՄԻ ՔԱՆԻ ՕՐ ԽԻՋԱՆՈՒՄ

(ԻՄ ՅԵՇՈՂՈՒԹԻԻՆՆԵՐԻՑ)

Տ. ՓԻՐՈՒՄԵԱՆՅԻ

Մայիսի առաջին օրերն էր: Երկնքի աստղերը արագ արագ նոսրանում էին: Նրանց մեծ մասը, որպէս պատրոյգի վերջին մնացորդ, մի օրհասական ճիգ էին թափում իրանց վերջին աղօտ լոյսն արձակելու ու յանկարծ հանգչում: Մեծ Արջը՝ գալուկ ու լուսասպառ՝ արդէն մօտեցել էր հորիզոնին: Լուսինն անհետացել էր մռայլ ամպերի տակ և տեղի աւել Արուսեակին, արշալոյսի այդ գեղաշուք թագուհուն: Մի անթափանցելի խաւար պատել էր Վանի մթնոլորդը. դա «Աղամայ մութն» է: Աղամայ մութ... ճիշտ այդ միջոցն են ընտրել վանի ժամկուները իրանց զիլ կոշնակներով փողոցէ փողոց ընկնելու ու բարեպաշտ մարդկանց ժամ հրաւիրելու, նրանց դռներին «Ողորմի՛ Աստուած» կանչելու: Այդ խորհրդաւոր պահուն մարդ ակամայ սարսում է. քաղաքի բոլոր թաղերում մի երաժշտական աղմուկ էր բարձրացել այդ փայտեայ գործիքներից ու նրանց մրճերից (կոշնակ): Վանի մերձակայ սարերը, Զըմփ-զըմփ մաղարան և ուրիշ քարափներ անդրադարձնում են իրանց արձագանքը, ճնճղուկներն ու ուրիշ երկնային թռչունները սկսում են յանկարծ ծըւծըւայ, ճըւճըւայ ու ճըկճըկայ: Գիշերւայ կուսական լուութիւնը, նրա յաւիտենական խաղաղութիւնը վրդովւում, եղծւում է: Դա մի սրբադան րոպէ է. Աղամայ մութը խաւարի թագաւորութեան ամենայնոին շունչն է: Բարեպաշտ ժողովուրդը արդէն ոտքի վրայ է, նա թոթափում է իրանից սև գիշերւայ մեղսաբեր ու աղջամղջային մոքերն

ու զգացումները և մտնում է Աստուծոյ տաճար վերջին հարւած տալու «Սատանայի չար պատրանքներին» իր սրտատրոփ զերամարիմքով:

Բայց գիտէ՞ք ի՞նչ է զողի ժամը.— ժամիդները, դեռ ևս փողոց չ'եւած, մտնում են եկեղեցի, վառում կանթեղներից մէկը, ազօթում ու դուրս գալիս քաշելու զանգերը, որին ապա հետևում է կոշնակ մանածելը: Տաճկաստանի հայերը այդ անդրանիկ զանգահարութեան տեւել են զողի ժամն մականուներ, զի նրա հետ կցւած ժամկոշների շրջանառութիւնը, մօտալուտ սաղմոսերգութիւնն ու ժամերների անց ու դարձը սարսափ են գցում բոլոր գողերի ու անառակների սրտում ու հայածում, խափանում խաւարի այդ չարասէր որդիներին... Այո', պէտք է ամեն բան պարզել:

Աղամայ մութն էլ շատ կարճատեւ է. Արուսեակի փայլը հեռո՛գհեռէ սաստկանում է, նրա յետևի ամպերը նոսրանում, գոլորշիանում են, կաթնագոյն եթերը սկսում է ժպտալ. արշալոյս...

— Դէ', առաջ ընկիր, Գասպա՛ր, — ասում եմ ձիապանիս, մի թեթեւ կռնկի հարւած տալիս ձիուս ու բաց թողնում նորա սանձը:

Մենք գնում ենք Խիզան, հին Կորդուաց աշխարհի մի մասը որ այժմ Բաղէշի վիլայէթի կազաններից (գաւառներից) մէկն է: Երեք օրւայ ճանապարհ ունինք: Վերջին օրը կը միանայ մեզ հետ նաև Կ. Պոլսում հիմնւած «Խիզանի ուսումնասիրաց ընկերութեան» տեսուչը: Բազաքի փողոցներում անընդհատ հանդիպում ենք ժամասէր այր և կանանց, որոնք գունդագունդ դիմում են եկեղեցի: Բայց արշալոյսի այդ կանուխ պահուն կարելի է պատահել նաև այնպիսիներին, որոնք արդէն յետ են դառնում այնտեղից: Կանոնաւոր ժամ երթալը այնպիսի մի հոգեկան պահանջ է Վասպուրականցիների համար, որ նրանից յետ չեն մնում նաև ամենաբազմազբաղ մարդիկ, որոնք այնտեղ երկար մնալ անկարող լինելով, ըտապով մի երկրագութիւն են անում Աստուծուն, կարճ աղերսներ ուղարկում առ Նա, յաջողութիւն հայցում նոյն օրւայ ըրարիւղսի համար ու հապճեպով դուրս ելնում, գնում իրանց գործին: Իսկ է օրագգալ ստաւրոգինս (մրգավաճառի ազօթք), ինչպէս ասում են յոյները Կ. Պոլսում:

Բաղաքն անցանք, ոլրծանք: Դուրսը, բաց դաշտումը արդէն

խրան սաստիկ զգալի էր անուժ ցուրտը, Վասսյուրականի այդ մալիսեան պաղ՝ առողջ մարդոց կազգուրող, բայց թոյլերի ոսկորները ծակող ու «խելքը մաղող» ցուրտը:

—Աֆանդի՛, աղօթարանը նոր է բացուում, հալա մի երկու սահաթ էլ ցուրտ կը լինի, մի կթխայ (րիւմկայ) էլ անուշ արա՛ որ չը մրսես:

Գասսյուրի զլխաւոր պիորացաւը՝ իմ մրսելս չէր: Ես իսկոյն հասկացայ նորա դարդը և խուրջինիցս օղին հանելով, մինը ես խմեցի, միւսը նրան տւի, ձմեռւայ վերարկուս աւելի պինդ կոճկեցի, ծխախոտս վառեցի ու նորէն ճանապարհ ընկանք, քերելով մեծ մասամբ Բզնունեաց ծովի ափերը:

Երկար չեմ կանգնի ճանապարհի նկարագրութեան վրայ: Վանից նախ գնում ենք Արտամետ, յետոյ Հայոց-Ձորի Անգղ ու Ոստան գիւղերը: Դա մեր հին Ոստան քաղաքն է, որ այդքան ծաղկեցաւ մանաւանդ Արծրունեաց թագաւորութեան օրով: Գիւղն անբողջապէս քիւրդերի ձեռքն է անցել, որոնք քանդել աւերել են նրա հին շինութիւնները: Տեղ-տեղ երևում են միայն կիսաւեր եկեղեցիներ և բազմաթիւ վանքեր (որոնց թւում նաև 40 խորան ունեցող Իլու վանքը), որոնցից մի քանիսը հետզհետէ նորոգւել են Աղթամարի կաթողիկոսներից: Այդ կանաչաւետ դիւղը լայն աստիճաններով բարձրանում է ծովի ափից և ունի հրաշալի հորիզոն:

Ոստանից մի քանի ելեէջեր անելուց յետոյ մտնում ենք Գաւաշի (Ռշտունեաց աշխարհ) կլորակ դաշտավայրը: Դա մի շատ զեղեցիկ կաթսայ է, շրջապատւած երեք կողմից լեռներով, իսկ շրորորդից — Վանայ ծովով, որի մէջ երևում է Ախթամարայ ժայռոտ կղզին իւր բարձրադիր վանքով: Շրջակայ լեռները ծածկւած են քսանից աւել աւերակ ու կիսաւեր վանքերով, որոնց մեծ մասը այժմ ծառայում է հայոց բերի ¹⁾ կամ քիւրդաց գոմերի տեղ: Անարատ և կանգուն է մնացել միմիայն նարեկայ հռչակաւոր վանքը, ճաճկահայոց այդ թանկագին սրբավայրը: Դա կառուցւած է դաշտի հիւսիսային լեռնակողի վրայ և դիտում է ամբողջ Ռշտունեաց աշխարհը, Բզնունեաց ծովի նշանաւոր մասը Ախթամար և Կոռուց կղզիներով և այլ հեռու տեղերը:

¹⁾ Կաթ կթելու տեղ, գիւղից դուրս:

Գաւաշից յտնում ենք Կարճկանի սահմանները. անցնում ենք Կապուտկող լեռը, Ս. Յակոբ Մճբնայ Հայրապետի անւանի վանքը ու մօտենում ցած հովտի մէջ գտնւող մի գիւղին:

—Աֆանդի՛, է՛ս էլ Բէլու գեղը,—ցոյց է տալիս մատով իմ չիւերոն Գասպարը—ասում են որ մեր Հայկ «Թագաւորը», երբ անօրէն Բելին յաղթեց, նրա լէշը բերեց, էստեղ Թաղեց...

Ականջներիս չեմ ուզում հաւատալ, լսելով իմ շատախօս ձիապանի պատմական տեղեկութիւնը:

—Քեզ ո՞վ ասաց,—գառնում եմ նրան. հեգնութեամբ, կարծելով թէ դա որ և է տիրացուի շինած «մասալ» է:

—Ի՞նչպէս թէ ո՞վ ասաց—նեղանում է ուղեկիցս—էսքան տարի քերթութիւնս կ'անեմ, բիթուն աշխարհքը տակն ու վրայ եմ առել, դէ՛ հրամմէ գնա Խայոց-Ձորայ Աստուածաշէն գիւղը, տե՛ս ի՞նչեր կը պատմեն...

—Դա հնուց խօսք է, ջանք, սուտն ու զորթը Աստուած գիտէ,—վրայ բերաւ նա փոքր ինչ աւելի սառնարիւն—ամմայ էս կողմերի բոլոր գեղըցիք հաւատում են էդ բանին...

Ես միամտացրի նրան ու աւելի ընդարձակ տեղեկութիւններ ուի մեր այդ հնադարեան աւանդութիւնից:

Եւ, ինչպէս յետոյ ստուգեցի, այդ և զրա նման անթիւ պատմական տեղեկութիւններ պտտում են Հայոց Ձորի, Ռշտունեանց և Կարճկանի գիւղացիների մէջ: Իսկ զալով մեր նախահօր խնդրին՝—գեռ մինչև հիմայ էլ Հայոց-Ձորի Աստուածաշէն գիւղի մօտ գտնւած մի մեծ աւերակ «Հայկայ-բերդ» է կոչւում, իսկ «Աստուածաշէն» գիւղի հիմնարկութիւնը նրա (Հայկի) յաղթանակի տօնախմբութեան ապացոյց է համարւում:

Հետեւեալ օրը, երեկոյեան պահուն, մենք հասանք վերջապէս Կարճկանի այն գիւղը, որտեղ կենում էր Խիզանի ընկերութեան տեսուչը: Նրա ուղեկցութեամբ պէտք է գնայինք միւս առաւօտ պաշտօնապէս քննելու ընկերութեան չորս կրթարանների վիճակը և արդիւնքը՝ Կ. Պոլիս, գործադիր ժողովին ուղարկելու:

Տեսի՛ հետ է նաև նրա ծառան, Խըլօ անունով:

«Խիզանի Ուսումնասիրաց ընկերութիւնը» պահում էր երեք ուսումնարան Կարճկանում և մինը միայն Խիզանում, թէև ընկերութեան նպատակը, ինչպէս իւր անունիցն էլ երևում է, ղլխաւորապէս Խիզանցոց լուսաւորութեան գործն էր:

Կարճկանը, ինչպէս նաև իւր հարևան Գեաւաշը (Ռշտունիք), Տաճկահայաստանի ամենաբերրի տեղերից մէկն է: Գտնւելով Կորդաաց լեռների ստորոտներում, դրանք՝ իրանց ընտիր ցորենով՝ կերակրում են այդ լեռների համարեա թէ բոլոր քիւրդ ու հայ բնակիչներին: Բայց Կարճկանը շտեմարան է նաև համեղ «գլուխ»-ի (սիսեռի մի տեսակը) ու օոսպո-ի, Հայաստանի անվերջանալի պասերի այդ անհրաժեշտ պարագաների: Կարճկանը, վերջապէս տարածում է իւր բարերարութիւնը նաև Վանայ ծովակի շրջակայ երկիրների վրայ իւր անսպառ փայտի պաշարով, որի համար, և շատ իրաւամբ, տրւել է նրան «Փէտի աշխարհ» հանրածանօթ անունը ¹⁾:

Այդպէս ուրեմն, տեղ բռնելով բարձրաբերձ Մոկսի, Շատախի, Դէհի, Բոհդանի (Կորդաաց լեռների վրայ) ու ցածրադիր Վասպուրականի արանքներում, նա տալիս է հաց իրանից վերև կեցողներին և տաքութիւն՝ իրանից ներքև ապրողներին:

Կարճկանի երեք զպրոցները քննելուց յետոյ մենք պէտք է անցնէինք Խիզան: Ես ճանապարհ դրի իմ Գասպար «քերաջուն» և վարձեցի մի շաբաթ ժամանակով մի ալ ձի:

Կարճկանի Եղեգիս գիւղից մինչև Խիզանի համանուն գիւղը տանում են երկու տարբեր ճանապարհներ. մինը բարձրանում է իրարու վրայ դիզած սարերով, միւսը գալարւում մի ծուռ ու մուռ, անվերջանալի ձորով: Մենք, ինչպէս ձիաւորներ, ընտրեցինք երկրորդը, թէև դա ճիշտ երկու անգամ երկար է, այն է տասներկու ժամ:

Վաղ առաւօտ, հէնց որ աղօթարանը բացւեց, ճանապարհ ընկանք տեսչի ու նրա Խըլօ կտրիճ ծառայի հետ, որ պէտք է սպասաւորէր ու հետևէր մեզ ոտով: Դա մի ղիւրաթեք, սրտատ ու ինքնապաստան լեռնի էր, հարազատ զաւակ Հայաստանի սարերի: Նա մեր ձիաներից աւելի լաւ էր քայլում և ուշ դադրում: Եւ իս-

¹⁾ Տես իմ «Վանայ ծովակը», «Մուրճ» 1890 № 4.

կապէս շատ քիչ ձի կարող էր նրա հետ ալդ բանում մրցել. նա շաբաթը մի անգամ Կարճկանից ոտով դնում էր Բաղէշ քաղաքը ու բերում այնտեղից տեսչի «փոշտան», գործ դնելով միմիայն երկու օր, մինչդեռ նոյնը անել մի հատ ձիով՝ համարեա թէ անկարելի է: Նա ման էր գալիս զինւած, ոչոքից չէր վախենում ու պէտք եկած տեղն էլ իրան քիւրդ ձեւացնում: Արգէն սկսած Կարճկանից և անցնելով Կորդուաց աշխարհի վրայով մինչև Բաղգադ ու Մոսուլ՝ հայերը հագնւում են ռացարձակապէս քիւրդերի նման ու խօսում նրանց բարբառներով՝ ո՛չ երբէք պակաս նրանցից:

Ուրեմն մեր «բրդաձև» Խըլօն հա՛մ սպասաւորում, հա՛մ առաջնորդում, հա՛մ պաշտպանում էր մեզ այդ բիրտ, խոպանացած ու «բարբարոս» երկրում:

Մօտ երեք ժամ այդ ձևով գնալուց յետոյ, մենք յայտնւում ենք Կարճկանի այն մասում, որ Կեցան է անւանւում և որի դարևոր, խիտ ու վսեմ անտառները և՛ հիացնում և՛ զարգանդեցնում են մարդուն: Գրանց մի կտորը, բաղկացած բարձր բարդենիններից, մեր ճանապարհորդած տարին գնեցին 10,000 ռուբլով՝ Վանցի երեք — ընկեր հայերը: Մնացածը, որի մէջ կայ նաև մեծ քանակութեամբ հացի ու թեղի ծառ, պատկանում է նոյն քաղաքի հարուստ թիւրքերին:

Կեցանի մէջ ձորը տեղ-տեղ կուչ է գալիս ու նեղանում, տեղ-տեղ՝ լայնանում ու երկրորդական ձորեր կազմում: Գիւղերը այդտեղ՝ տեղի անյարմարութեան պատճառով՝ շատ նւազ են ու սակաւամարդ՝ ութ, տաս, տասնըհինգ տնից բաղկացած: Նրանց դիրքն էլ ազգագրական տեսակէտից ոչինչով չէ գանազանւում Հայաստանի բոլոր գիւղերից և մի աւելորդ անգամ էլ յիշեցնում մի շատ յիմար երևույթ. բարձր, զով ու փարթամ տեղերում տնկած են քրդաց, իսկ ցած, խեղուած ու գձուձ փոսերում — հայոց գիւղերը...

Ձորի մէջ յաճախ պատահում են ու զանազան ուզողութեամբ փախչում մանր գետակներ, որոնցից մէկը քանի որ մօտենում ենք Խիզանին՝ հետզհետէ մեծանում է և այն աստիճան՝ որ անհնարին է լինում ձիով անցնել: Այդտեղ ահա՛ առաջարկում են մեզ իրանց ծառայութիւնը այն նախնական՝ իսկապէս չլիխպուտների և ոչ թէ «սոցալազայ» խիղանցիներին յարմարեցրած՝ «կամուրջները», որ բարի

մարդիկ իրանց յօժար կամքով և հոգու փրկութեան համար սարքում են այդտեղ: Նրեակայեցէք երկու երեք բարակ գերանների վրայ ածած ծառի ճիւղեր, վրան մի քիչ հող կամ աթար ածած, մի արշին լայնութիւն ունեցող մի «ճլորդի», որ անհամ կերպով ճրռճրռում է ձեր ոտների տակ ու ձեր լիւելքը մաղում, ստիպելով ձեզ նայել նրա տակը վշվշող փրփրակապ, կատաղի գետակին ու նրա մէջ բիզբիզ ցցւած ահարկու քարերին: Բայց երեւակայեցէք նոյնպէս որ դուք մենակ չէք, այլ մի ձեռքով քաշ էք տալիս ձեր յեռեկից նաև մի «ջանաւար», չորքոտանի մի բարեկամ, որ անհրաժեշտապէս կարօտ է ձեր օգնութեան — և դուք մի մերձակայ գաղտփար կը կաղմէք այն հռչակաւոր մազէ-կամուրջներին վրայ, որոնցով տաճկաստանցի հին աբեղաներն ու պառաւ մամիկները սարսուռեցնում են մեղաւոր հողիներին ու անմեղ մանուկներին:

Այդպիսի մազէ-կամուրջներից մէկիցն էր որ իմ խեղճ ձիս «Թրմփալի» «դրխկաց» գետակի սրածայր քարերին, բաղմաթիւ վէրքեր ստացաւ մէջքին ու, ինչպէս յետոյ տեղեկացաւ, ձեր «չարը տարաւ»: Առաջ նրա մի ոտը խրւեց «կամրջի» ծակերից մէկում. երեք հոգով թափւեցանք նրան օգնելու, մօտ հինգ րոպէ չարչարւեցանք, բայց տեղի նեղութեան պատճառով անկարող եղանք ոտը վեր քաշելու: Այն ժամանակ խեղճ անասունը մի վերջին ճիգ թափեց ինքն իրան օգնելու, բայց հէնց որ ոտը դուրս խլեց՝ հաւասարութիւնը կորցրեց ու մէջքի վրայ զրնգաց այն մահաբեր քարերին...

Սակայն դարեր առաջ, երբ մի քիչ տարբեր հանգամանքներ էին տիրում այդ երկրում, այդ վտանգաւոր ճլորդիների տեղ կամ գոնէ նրանց հետ միասին լողիլ են նաև խիստ ամուր ու սիրուն կամուրջներ, որոնցից մէկի հետքերը՝ կամարները կոփածոյ կարմրագոյն քարերից՝ արտադրութիւն խիստ վարպետ ձեռքերի՝ հիացնում են դեռ. ևս հետաքրքիր անցորդին: Պակաս չեն նաև վանքերի ու բերդերի մնացորդներ: Նրբ ես դրանցից մէկի առաջ ձիս կանդնացրի ու գլուխս ծռելով սարսափահար վերեւ նայեցի՝ — մեր նոր չիւերոն Խըլօն առաջս տնկւեց ու բացատրեց որ այդ մինչև երկինքը բարձրացող «Սմբատ թագաւորի բերդի» գլխից ներքև էին վիժում հայերը տեղութեան մահապարաններին, որոնց ալեհամեծ կտորը ականջն էր մնում:

Հետզհետե՛ բարձրանալով ու բարձրանալով, մենք մօտեցանք վերջապէս, արեւի մոտեցող մի քիչ առաջ, Խիզանի սահմաններին. ու մի քանի զիզզազներ ու ելեէջեր պործելուց յետոյ մօտնք մեր ուզած գիւղը:

Առաջինը, որ խիստ աչքիս զարկեց այդ ալպեան երկրում, դեռ ևս հեռուից՝ խիզանցիների երկչարկանի տներն էր: Հայաստանի մեծ մասը պտտելուց և նորա խրճիթները Քսենոփոնտի ու Հերոդոտի նկարագրածի համեմատ գտնելուց յետոյ դա մի աներևակայելի բան էր ինձ համար: Ռուսաստանում, Պարսկաստանում և Տաճկաստանում տեսել եմ հազարաւոր հայ գիւղեր և նրանց բոլորի աներն էլ շինւած են նոյն և մի անդրջրհեղեղեան ճարտարապետութեամբ. մի արշին գետնի տակից սկսած՝ նրանք բարձրանում են 2—4 արշին գետնից վեր, տափակ, սլաղաձ տանիքներով: Երկչարկանի տները Սալմաստի գիւղերում ոչինչով չեն փոխում, իմ կարծիքով, այդ ընդհանուր երևոյթը, քանի որ սալմաստցի տղամարդիկ ապրում են իբրև քաղաքացի Թիֆլիսում, Խաւրիզում և Ռուսաստանում, պարապմունք ունենալով չարչիութիւն, վաճառականութիւն ու խաչագողութիւն: Եւ շատերը պէտք է զարմանան լսելով, որ Սալմաստի այդ փոքրիկ գիւղ-քաղաքները շրջապատւած են հաստապինդ ու խիստ թանձր պարիսպներով:

Սակայն տների հայկական տիպը փոխւում է դեռ ևս Կարճկանում: Տանիքները այլապէս ոչ թէ տափակ, այլ կոնաձև են, դրսից կանոնաւոր կերպով սլաղաձ ու ծայրին մի ծակ թողած: Հեռուից թուրքի զլխներին նմանող այդ բրգերը շատ գեղեցիկ են ներսից: Նրանք կազմւած են խաչաձև, միմեանց մէջ հաղցրած գերաններից: Ամեն մի սենեակի զլխին՝ չորս պատը կանգնեցնելուց յետոյ՝ նախ և առաջ շինում են մի կիսատ, մօտ մի արշին լայնութեան առաստաղ, բաց թողնելով այդպիսով մի քառակուսի դատարկութիւն: Ապա վերցնում են չորս հատ տաշած դերան, իրաքանչիւրը 4—6 արշին երկարութեամբ ու զոյգ զոյգ այնպէս դարսում միմեանց վրայ, որ ծայրերին խաչեր գոյանան: Յետոյ վերցնում են աստիճանաբար միշտ փոքր և փոքր գերաններ և նոյն ձևով ու մի կատա-

բեալ ներդաշնակութեամբ նրանց միջի տարածութիւնը փոքրացնելով, հասնում են վերջը՝ մօտ չորս արշին բարձրութեան վրայ՝ մի կէս-քառակուսի արշին դաւարկութեան, որ և ծառայում է որպէս էրթիս—լուսամուտ։ Գերանների աւելորդ ծայրերը դրսից կտրտում են ու կոնաձեւ սլուաղում, իսկ ներսից նրանց շարւածքը՝ ինչպէս սասցի՝ մի գեղեցիկ տեսք է ընծայում շինականի անզարդ ու անարեւսոյ բնակարաններին։

Հայաստանի բոլոր այն գիւղերում ուր տները մի յարկանի են, ուրեմն համարեա թէ նրա բոլոր կողմերում, գիւղացու տունը բաղկանում է 1. տան-տնից—որտեղ նա թոնիր ու օջախ ունի, ապրում է, եփում ու քնում՝ շատ անգամ մի քանի զոյգ ամուսիններով. 2. ւփազեակից (ախոռատուն), որտեղ նա իւր կովը, եզն ու գոմէշն է պահում և 3. մահաանից— ուր նա իւր բոլոր ուտիսւայ ու պասւայ պաշարեղէնն է ամբարում։ Բայց չափաւոր կարողութեան տէր գիւղացիք, ուրեմն մի խոշոր քանակութիւն այդ ժողովրդի, մի տնտեսութիւն են անում. նրանք իրանց մի քանի զոյգ չարքոտանիներին իրանց «տան-տան» մէջն են հիւրասիրում... Բայց Խիզանի հայ լեռնականը այդ խոհանոցը, ախոռն ու մահաանը ներքեւը թողնելով հանդերձ, մի երկրորդ բնակարանն էլ աւելացրել է նրանց զլխին յատկապէս իր նստելու ու քնելու համար։ Բացի այդ, նա արհամարհել է Հայաստանում այնքան խոր արմատներ ձգած էրթիսները ու իր կացարաններում փոքրիկ պատուհաններ բացել, որոնք ձմեռը թղթւում են ձէթոտ թղթով, իսկ ամառը իսպառ բաց մնում։ Արդեօք դա ապացոյց չէ՞ որ ազատ լեռներում ազատ օդ ծծող ու ազատ սիրտ կրող բնութեան որդին անկարող է կուչ գալ խոնաւ ու մռայլ նկուզներում։

Բայց Խիզանցիք աննախանձելի են շատ ուրիշ կողմերից. տնտեսական նեղ դրութիւնը կաուարելապէս խեղդում է նրանց։ Խիզանցոց ու նրանց դրացի այլ հայ լեռնականների պարապմունքը ինքը բնութիւնն է որոշել, տալով նրանց այդ հիանալի, խոտաւէտ ալպերը։ Բայց խաշնարածութիւնը որ նրանց ամենագլխաւոր և զրեթէ միակ—քանի որ խօսքը այստեղ մի ասիական ժողովրդի վրայ

է — պարապմունքը պիտի լինէր՝ խիստ սահմանափակ ու աղճատուած է տեսական անկուշտ քիւրդերի ու նրանց ամենազօր շէյխերի բռնակալութեամբ: Բաւական է յիշեցնել ընթերցողին որ գրած քիսնիւթը ուրիշ բանի վրայ չէ, բայց եթէ հանրածանօթ Շէյխ-Ջալալէդդինի «հայրենիքի» վրայ:

Թէպէտև Խիզանի, ինչպէս նաև Կորդուաց աշխարհի միւս գաւառների հայերը, անհամեմատ բարձր են իրանց սրտոտութեամբ մեր սովորական ազգայիններից, բայց և այնպէս նրանք ընդունել են իրանց վրայ քրդերի գերիշխանութիւնը: Հարկ տալով մի կողմից նրանց շէյխերին և միւս կողմից՝ աիրապետող տէրութեան, նրանք ընկել են տնտեսապէս, զիմեւ պանդխտութեան ու մինչև իսկ կաւարեալ գաղթականութեան, տեղի տալով իրանց թշնամի տարրին: Այդպիսով հէնց նոյն արագութեամբ որով քրդերը աճում են այգտեղ օրէցօր, նոսրանում և սպառուում են հայերը: Գիւղեր եմ տեսել, որունց տաս — տասնըհինգ տղամարդից աւելի չը կար, զի բոլորն էլ «կարիքութեան» էին գնացել: Ահա՛ այդ հակառակ տարրերի անհասարկութիւնն է պատճառ, որ խիզանցիք սաստիկ վախենում են շատացնել իրանց անասունները, որպէս զի «շան և գէլի» փայ չը դառնան նրանք: Նրանց գիւղերը շինւած լինելով չափաւոր և միջին բարձրութեան լեռների վրայ, ամենաբարձրերը նրանք պահում են որպէս ամառանոց իրանց հօտերի, որոնց հետ ուղեւորւում են նաև իրանք իրանց ընտանիքներով և մնում այնտեղ ամբողջ երեք ամիս, բաց երկնքի տակ:

Այդ մինչև երկինքը բարձրացող լեռնագագաթները հիւր գնալուն նրանք ասում են «զօմայ երթալ» և տարւայ այդ եղանակին «զօմալ» գնացողների թիւը Խիզանի կէսից պակաս չէ:

Խաշնարածութիւնից յետոյ խիզանցիք պարապում են երկրագործութեամբ: Ձուներնալով ոչ մի կտոր տափարակ տեղ, նրանք մշակում են լեռների զառիվայքները կամ նրանց կողքերը: Բայց այդ «կողքերը» երբեմն այն աստիճան ուղիղ ու ողորկ են լինում, որ մի անսովոր մարդ ոչ թէ վառ ու ցանք, այլ նոյն իսկ զբօսանք անել չի համարձակի այնտեղ: Բայց խիզանցին, որ սարդի պէս մազլցում ու ման է գալիս քարափներին, արօրով հերկում, ցանում ու աճեցնում է այնտեղ իր անհրաժեշտ հացահատիկները: Դեռ ևս այդ

կողմերը չը գնացած, ես լսել էի Վանում որ իբր թէ երբ խիզանցին վառ ու ցանք է անում՝ նրա կինը կամ մի այլ ոք նրա մէջքից մի շահն է կապում ու ծայրը պինդ կերպով ձեռքում բռնում կամ մի ցցի վրայ ամրացնում... Թէև այդ ընդհանրացած կարծիքը, ինչպէս իմ հարց ու փորձն ապացուցեց, բոլորովին սուտ դուրս եկաւ, բայց և այնպէս մի անգամ էլ համոզեցայ, որ կարիքն ու հանգամանքները զարմանալի հրաշքներ են գործել տալիս մարդոց: Աիրտս շուռ ու մուր էր գալիս դիտելով գիւլից թէ ինչպէս հաբիւրաւոր ուխար, կով, կին ու երեխայ վիտուս էին մըջիւնները նման դիմացի բոլորովին ուղղաձիգ սարի կրծքին: Փորձեցի մի պտոյտ անել այդ լեռներում գիւղացիների հետ, բայց երկու ժամից յետոյ յետ փախալ, ամաչելով երկու ձեռքերիցս բռնած՝ եպիսկոպոսի նման՝ «տոտիկ» անել այնտեղ, ուր մարդիկ թուկտոտելով ու երգելով են անցկացնում:

Խիզանցոց մշակած հացահատիկներն են գլխաւորապէս կորեկն ու զարին. մշակում է նաև բաւական քանակութեամբ տարեկան: «Տարեկանը» ցորենի մի հոսարակ տեսակն է, որ բնում է սարոտ, սակաւաջուր ու անբերրի տեղերում: Նրա հացը ցորենի հացից պակաս համեղ է, կպչուն և նւազ սննդարար: Բայց խիզանցոց սովորական հացը կորեկի վերին աստիճանի անհամ հացն է, որ թխւելուց յետոյ իսկոյն չորանում, քարանում է ու գաջի պէս փշրւում: Դրան գլխաւորապէս գործ են ածում «բրդելու» համար՝ մածնի ու «գետրոմազդի» մէջ: Հայաստանցիների սիրած, զրեթէ ամենօրեայ կերակուր, «գետրոմազդը» այն թթու հեղուկն է, որ մնում է «ծծումի» մէջ՝ մածնից իւղ շինելիս: Գարուց լոշեր են թխում սովորաբար տարեկանի հետ խառը, մինչդեռ կորեկից, նրա չափազանց անկպչուն լինելու պատճառով, միմիայն կլոր, մօտ քառորդ արշին տրամագծով ու կէս վերշոկ թանձրութեամբ՝ հացիկներ: Խիզանցի տանտիկիները, ինչպէս նաև Տաճկահայաստանի համարեա բոլոր գեղջիկահիները «եփում» են իրանց ամենօրեայ հացը հէնց ամեն Աստուծոյ առաւօտ: Նրանց լեռներին անմատչելի ցորենը՝ պէտք եղած ժամանակ՝ բերւում է Կարճկանից կամ Գեաւաշից: Նրանք մշակում են, ինչպէս նաև նրանց դրացի լեռնականները, կանեփ, որի թելերից շուաններ են հիւսում իրանց ոտնամանների

Համար: Այդ ոտնամանները՝ թէ՛ արանց և թէ՛ կանանց՝ «վրաշիկ» կոչւած տրեխներն են որ զործւում են բացառապէս կանէփի շւանից ու տակը կարճ բլեւեռներով ծածկւում: Դա շատ է նպաստում նրանց սատանի նման սարի կողերին մագլցելուն, թէէն նրանք ընդունակ են նոյնը անել նաև բոքիկ ոտով: Գործում են նոյնպէս չափաւոր քանակութեամբ կտաւի հաստ տեսակից իրանց գործածութեան համար: Արդէն նրանք հէնց ամեն բան իրանց գործածութեան համար են շինում: Նրանք զուրսը ոչինչ չեն արտադրում, այլ՝ ընդհակառակը՝ ներմուծում:

Թէ որ աստիճան անգոհացուցիչ են այդ բոլոր «ծրտի-սլրտի» արտադրութիւնները համեմատած խիզանցոց ահագին ծախսերի հետ—կը հասկանայ ամեն ոք հետազայից: Նրանք ավելից առաջ վճարում են տէրութեան բոլոր օրինական տուրքերը. երկրորդ՝ ձրի ծառայում են (հերկում, ցանում, հնձում և այլն) քիւրդ-շէյխին ու որոշ պարգեւներ տալիս նրան (ոչխար, բերքեր, փող) և երրորդ՝ անպատմելի «կրօնական» տուրքեր են տալիս կնուների, պսակի ու հաղար ու մի դէպքերի համար Ախթամարի կաթողիկոսին, որի իրաւասութեան տակ, արդէն դարերից ի վեր, գտնւում են նրանք:

Ահա՛ այդպիսի մի դրութիւն են ստեղծել հանգամանքները այդ կտրիճ լեռնականների համար: Մի դրութիւն, որից ելնելու համար նրանք դիմում են պանդխտութեան, գաղթականութեան ու վաշխառուի հարստահարութեան: Ի դէպ է այստեղ յիշատակել, որ այդտեղի վաշխառուները բացառապէս բաղէշցի ասորիներն են: Այդ մի բուռն մարդիկ որոշ շրջանների են բաժանել Խիզանն ու նորա մերձակայ լեռնոտ գաւառները ու տարին միայն մի քանի անգամ «այցելութեան» շնորհ անելով նրանց, կատարում են իրանց բոլոր գործառնութիւնները:

Մասնաւոր ուշադրութեան արժանի են հայ կանայքը Խիզանում: Ախայցխայի բնքոյշ, վերին աստիճանի չքնաղ իգէալական—գեղեցիկ հայուհիներին և Վանի ժիր, կայառու, թարմ ու առողջ աղջիկներին տեսնելուց յետոյ՝ ես անհնարին եի համարում գտնել որ և է տեղ հայ իգական սեռի աւելի գրաւիչ ներկայացուցիչներ:

Բայց այն, ինչ որ ես տեսայ Խիզանում, մի բողոքովին ուրիշ բան էր: Խիզանցի կնոջ մարմինը նախ և առաջ մի միջին տեղ է բռնում Ախալցխայի կնոջ քնքոյշ-վարդագոյն և վանցի կնոջ թարմ-արիւնտ մարմինների մէջ. բնական քնքուլթիւնն ու լեռնական աշխատասէր, անվհեր, ուժեղ կեանքը մի հրաշալի խառնուրդ են պատրաստել այդտեղ:

Բայց Խիզանցի կինը ունի նաև երկու ուրիշ մեծ առաւելութիւններ: Առաջինը՝ նա բարձր է հասակով ոչ միայն ախալցխայի ու վանցի կանանցից, այլ ամեն տեղի կանանցից: Իսկ աչքի առաջ ունենալով գիտութեան մէջ յայտնի ազգագրական տեղեկութիւնները զանազան աշխարհների կանանց հասակի մասին, ես հաստատ կարող եմ առել, որ Խիզանցի հայ կինը աշխարհի ամենաբարձր կանանց տեսակիցն է: Երկրորդ՝ Խիզանցի գեղջկուհու աչքերը սովորական աչքեր չեն. սիրուն, բայց խոր, վսեմ, լուրջ և հպարտ. նա նայում է մարդուն քննելով ու ուսերի վրայից, բայց միևնոյն ժամանակ նա չէ խնայում ընծայել ձեզ իւր սքանչելի, սիրասնունդ ժպիտները: Ո՛չ շատ պարարտ և ո՛չ նիհար կանայք գոյութիւն չունին Խիզանում, բայց ամենքն էլ մնալի են և այնքան մնալի որչափ որ հարկաւոր է նրանց բնական գեղեցկութիւնը և՛ս աւելի փարթամացնելու ու մի զգայուն տղամարդին բերանաբաց թողնելու... Եթէ այս չքնաղ դէմքին, ձիգ ու արձան հասակին, խոշոր, իմաստուն աչքերին ու աննման-փարթամ մարմինն աւելացնենք նաև մի խրոխտ ու արքայավայել քայլածք՝—կստանանք կատարելատիպը այն լեռնական վսեմ թագուհու, որ Խիզանցի գեղջկուհի է անւանւում: Նա քայլում է հաստատ ու մտածած քայլերով, նրա քայլածքի մէջ երևում է սեպհական արժանաւորութեան զգացում, նրա քայլերի տակ զնգզնգում է գետինը: Եւ այդ թանկագին էակի հագուստը այսպիսի մի ծայրահեղ պարզութիւն է ներկայացնում. մերկ մարմնի վերայ նա հագնում է տղամարդու սովորական շապիկը՝ (ընդհանուր երևոյթ ամբողջ Ցաճկա-Հայաստանում, թէ՛ գիւղում, թէ՛ քաղաքում) բացւած կրծքի մէջ տեղում. դա կոճկում է միայն մի տեղ, կոկորդին: Ներքեւի մասի վերայ, հագնում է կարմիր շիւղայի (քաթան) լայն ու երկար վարտիկ, որի բերանը կուչ է բերւում ոտների մօտ մի չւանով, ինչպէս պարկի բերան: Այնու-

Հետև նա գցում է վրան իւր մի տեսակ երկար շապկի նմանութիւն ունեցող՝ միապաղաղ դերիան ու մէջքը չւանով կապում: Այդ դերիան էլ կրծքի մէջ տեղն է բացւում և համարեա թէ երբէք չէ կոճկւում: Նա միշտ բոբիկ է, վրռչիկները պահում է միմիայն երկար ձանապարհորդութեանց համար: Գլխին դնում է իւր շնորհալի «կոտիկը» ու գցում վրան մի կարմիր շիլայի թաշկինակ, որի երկու ծայրերը կապւում են բզի տակ: Այդ «կոտիկը» ընկուզենու բարակ փայտից ոլորած մի կիսալուսին է Թիֆլիսի կանանց «խիտուխի» նման, բայց աւելի բարձր, մօտ երեք վերշուկ:—Այդ է խիզանցի կնոջ բոլոր արդուզարդը:

Նրա թւեքերը միշտ վեր քաշած են լինում մինչև արմենների վերջը, երեսը—մի հագւազիւտ երևոյթ ամբողջ ճաճկահայաստանում—միշտ բաց. կիսաբաց է նաև նրա լուսաթաթախկութեքը: Եւ այդ գեղեցկուհիները մեծ տնտեսական ոյժ են ներկայացնում իրանց երկրում: Արդէն վերեն ասացի, որ այնքան մեծ քանակութեամբ են խիզանցի տղամարդիկ պանդխտութեան դիմում, որ ամեն մի գիւղում հազիւ տաս, քսան տղամարդ է մնում, մի կողմ թողնելով ծերունիներին ու երեխաներին: Հապա ո՞վ պէտք է կատարէ ոչ միայն տնային, այլ և դրսի՝ սարի ու «դաշտի» գործերը: Ո՞վ պէտք է պահէ ծերերին ու երեխաներին: Ո՞վ պէտք է լինի տան ներկայացուցիչը:—Գեղեցկուհին և միշտ գեղեցկուհին: Նա դանում է, հնձում, ջրում ու պարարտացնում արտերը: Նա գառներ, այծեր ու կովեր է տանում արօտները: Նա ահագին թթոցներով մէջքին շալակած՝ «կու» (կենդանիների աղբ) է կրում բնաւ ստորութիւն չը համարելով իր համար...

Այո՛, երկիցս պաշտելի է նա, այդ խիզանցի հայուհին: Պաշտելի՝ իւր սպանող գեղեցկութեամբ, պաշտելի՝ իր բնաւորութեամբ: Եթէ որեւիցէ հատընտիր գեղեցկուհիների մի միջազգային դուցահանդէս կազմէր Եւրոպայում, խիզանի սարերից այնտեղ մի քանի նմուշ տանելը ես շատ անհրաժեշտ կը համարէի:

Դժբաղդաբար իգականի նման չէ արական սեռը խիզանում: Խիզանցի տղամարդը երևում է թոյլ, յոգնած, մաշւած: Եւ այդ ոչ

միայն հասակաւորները, այլ և երեխաներ նու պատանիները՝ հինգ տարեկանից սկսած. Խիզանը էէ արտադրում լաւ արական սեռ... Ես չեմ ուզում այդ երեւոյթի պատճառները փնտռել այստեղ, բայց ինձ համար մասնաւոր կարեւորութիւն ունի ամուսնական ինդիւրը նրանց մօտ:

Երբ ես առաջին անգամ, բոլորովին միամիտ կերպով, հարցրի Խիզանի մի 25 տարեկան ուսուցչին թէ քանի՞ տարի կը լինի նրա պսակելը, նա՝ ինձանից էլ աւելի միամիտ կերպով՝ պատասխանեց. «ո՛վ ունի միտը... ինչ որ աչքս բաց եմ արել, պսակած եմ: Յետոյ արդէն ես ստուգեցի որ խիզանցոց մեծ մասը, այդ ուսուցչի պէս, հէնց որ «աչքը բաց են արել», իրանց կողակիցներին իրանց կողքին են տեսել. նրանց նշանել են օրորոցում կամ 2—3 տարեկան ժամանակ ու պսակել 7—9 տարեկան հասակում: Մանկահասակ հարսը փնում է փեսենց տանը իբրեւ նրանց հարազատ աղջիկ մինչև ամուսինների պէտք եղած հասունութիւնը: Շատ քիչ են պատահում այն տեսակ ամուսնութիւններ, երբ հարսն ու փեսան ֆիզիքապէս պատրաստ են լինում, թէև այդ դէպքում էլ նշանակը անպատճառ փոքր հասակիցն է սկսում:

Որովհետև իմ Խիզան գնալու գլխաւոր շարժառիթը նրա ուսումնարաններն էին, հարկ եմ համարում ասել մի երկու խօսք նաև այդ մասին:

Դեռ ևս եօթանասնական թւականներին պանդուխտ խիզանցիները կոպէկներ են հաւաքում իրանց մէջ իրանց հեռաւոր հայրենիքի համար որևէ օգտակար գործ անելու: Մի քանի ոսկի շինելուց յետոյ, նրանք վճռում են մի ուսումնարան հիմնել Խիզանում, շինում են մի կանոնադրութիւն ու կազմակերպում «Խիզանի ուսումնասիրաց ընկերութիւնը»: Բայց զգալով մենակ գործելու դժւարութիւն և նազ ձեռնհասութիւն այդպիսի լուրջ բաներում, պանդուխտ գիւղացիք իրանց մէջն են առնում Պոլսեցի մի քանի գաւառասէր ու հասկացող մարդիկ, պաշտօնական ձև տալիս ու այն աստիճան ընդարձակում իրանց ընկերութիւնը, որ նա բաց է անում կարճ միջոցում հինգ հատ ուսումնարան Խիզանում ու Կարճկանում,

պահում վեց-եօթ ուսուցիչ ու մի Վրնդհանուր տեսուչ: Բայց որովհետև ընկերութեան գործադիր ժողովը իւր բոլոր տեղեկութիւնները ստանում էր այդ ընդհանուր տեսչից և իւր բոլոր տնօրէնութիւնները հիմնում էր նրա խօսքերի ու կարծիքների վերայ, — նա հարկ անհրաժեշտ էր համարել ուղարկել Պօլսից կամ մի ուրիշ տեղից մի բանիմաց մարդ ու քննութեան ենթարկել ոչ միայն աշակերտների գիտութիւնը, այլ և ուսուցիչների և տեսչի այդպիսի մի յետ ընկած երկրում գործելու յարմարութիւնները: Նա պատիւ արեց ինձ, յանձնելով այդ փափուկ պաշտօնը:

Բայց այդ միջոցին (1886 թ.) փակած էր արդէն, շնորհիւ Աթթամարի կաթողիկոսի անտարբերութեան ¹⁾, ընկերութեան ուսումնարաններից մէկը: Ուրեմն ինձ մնում էր տեսնել մնացած չորսը (3—5 տարւայ ուսումնի, մօտ 200 արական սեռի աշակերտներով), որ և արեցինք ընդհանուր տեսչի հետ երկու շաբաթւայ ընթացքում: Իմ ընդարձակ տեղեկագրի մէջ ես շատ մանրամասն նկարագրեցի ու բացատրեցի այն ամենը ինչ որ կաւոյ ունէր գործադիր ժողովի հետաքրքրութեան, հոգածութեան ու պարտականութեանց հետ: Բերում եմ այստեղ միմիայն նորա մի քանի տող — վերջաբանը, որից հետաքրքիր ընթերցողը կարող է շատ և շատ բան հասկանալ: Վնւպէս տեսաք, Ձեր Ընկերութեան բոլոր գործիչները՝ թէ՛ Գործադիր ժողովը, թէ՛ տեսուչը, թէ՛ ուսուցիչները և թէ՛ վերջապէս գիւղացիք՝ շատ և շատ յանցանքներ ունեն: Յանցանքներ ունենալու խիստ եպերելի չէ, երբ յանցաւորը ճգնում է օր առաջ շիտակ ճանապարհը փնտռելու: Անցածն անցել է անդառնալի կերպով: Ես նայում եմ ձեր գործունէութեան իբրև մէկ յառաջաբանի վրայ: Այդ մի նախակրթարան էր ոչ միայն աշակերտների, այլ և գիւղացոց, ուսուցիչների, տեսչի և... Գործադիր ժողովիդ համար: Վնւա՛ւ, բնա՛ւ մի՛ կարծիք, իմ յարգելիք, թէ փարայ մի, ստակ մի կորցրիք: Գա՛ւ լիցի: Ձեր ամեն մի փարան հարիւրապատիկ արդիւնք է արտադրել: Ուրիշ է քննել մէկ մարդու կամ հաստատութեան գործունէութիւն, ուրիշ՝ ցոյց տալ նրա դրական էութիւնը: Հազարաւոր թերութիւններ կարող եմ ցոյց աւել Ձեր

¹⁾ Այդ մասին ես կը խօսեմ մի ուրիշ լողաճում:

գործունէութիւնից, բայց մի բան միշտ կայ ու կայ և այդ է մի լոյս, որ սփռել էք խաւար ու անմխիթար գիւղացոց վրայ: Մե՛ծ է այդ գործը:

Պէտք է մի անգամ տեսնել Կարճկանի և մանաւանդ Խիզանի լքեալ, ազէտ, կիսավայրենի ու խոպանացած գիւղացոց կեանքը, որպէս զի համոզւիք թէ ի՞նչ մեծ բան է, երբ նրանց զաւակները կարողանում են մի բան կարդալ, գրել, պատմել, քննել, հաշուել: Ե՛լ մի կողմ թողնենք նրանց աշխարհագրութիւնը, տաճկերէնը և այլն և այլն, որ մի մի համալսարանական ուսում են նրանց համար:

Պէտք է մի անգամ մարդ այցելէ այդ կիսակործան վայրերը որպէս զի համոզւի թէ ի՞նչ անփոխարինելի մխիթարութիւն է այդ վշտակիր, աշխարհից մոռացած, շինականների համար, երբ տեսնում են թէ Բիւղանդիոնի յոյժ հեռաւոր փերում կայ բարի մարդկանց մի խումբ, որ ցաւակից է իրանց ցաւերին, ուրախակից՝ իրանց ուրախութիւններին:

«Սրհնիա՛լ լինիք, բարի՛, ազնի՛ւ ծառայք Քրիստոսի:

Կենքում եմ վերջապէս խօսքս, յայտնելով իմ խորին շնորհակալութիւնս Խիզանի ընկերութեան բոլոր անդամներին և գործադիր ժողովիդ: Ձեր յոյժ բեղմնաւոր և պատւաբեր աշխատանքի համար:

Սակայն, հակառակ իմ այդ մաղթանքներին, հետեւեալ տարին ընկերութիւնը փակւեցաւ... Նա այլ ևս չը կարողացաւ դիմանալ այն զօրեղ հոսանքին, որ գալիս էր Միացեալ ընկերութեան համակրողներից, որոնք ուզում էին անպատճառ կուլ առլ այդ փոքրիկ ընկերութիւնը իրանց մէջ և ձեռքն առնել ամբողջ ճաճկահայստանի լուսաւորութեան դործը: Բաւական ժամանակ, քանի որ ես այնտեղ էի, դեռ ևս ոչինչ կարգադրութիւն չէր լինում այդ մասին, իսկ թէ յետոյ վերաբացւեցա՞ն ուսումնարանները կամ ոչ — հաստատ տեղեկութիւն չունեմ ես:

1886-ին Խիզանի շէյխութիւնը, մեռած Զալալէղզինի տեղ, վարսւմ էր նրա եղբայր Մահմադը: Դրանց ընտանիքը վաղուց ի վեր արտոնութիւն ունի ժառանգաբար շէյխութիւն անելու: Այդ շէյխէրը, որ ոչ միայն հոգեւոր, այլ և մարմնաւոր դուլիս են Խիզանում,

վայելում են իրանց հպատակների անսահման յարգանքն ու աստուածացումը։ Նրանց ամեն մի խօսքը օրէնք է, ամեն մի ցանկութիւն—աստուածային ներշնչում։ Նրանց չէ կարելի բամբասել, քննել ու հակադասել։

Բայց շէյխի սրբութիւնը տարածւում է շատ աւելի հեռուն. նա յայտնւում է իւր ժողովրդին որպէս աշխարհի ամենամեծ «հեքիմաշի» (բժշկապետ)։ Նրա օգնութեան են դիմում ամեն տեսակ ցաւազար ու ախտաժեռ մարդիկ և նա գոհացնում է ամենքին, «որքան որ ոյժը պատում է», որովհետև նրա դեղերը մեր՝ բժշկների տաճ դեղերի պէս անսպառ չեն. նա բժշկում է իր թքով, երեսի, ձեռքի, ոտքի ու շորի լւացքաջրով... Մէկին նա տալիս է իր՝ մի փալասի կտորի մէջ գցած՝ թուքը կամ խորխը, որ նոյնպէս պէտք է տրորէ ջրի մէջ ու խմէ։ Միւսին՝ իր մարմնի կամ շորի լւացքի ջուրը, որ նոյնպէս պէտք է խմէ կամ հաց ունցէ նրանով և ուտէ։ Մի երրորդը մօտենում է ինքն իրան՝ շէյխի ձիով մանգալու ժամանակ՝ ու ազահութեամբ յափշտակում նրա չորքոտանու վերածած աղբը առ ի վայելում...

Շէյխի ճանապարհորդութիւնը լինում է կաաարեւապէս արքայավայել. ոչ միայն մոլեռանդ քիւրդերը, այլ նոյն իսկ տաճիկները ամեն տեղ կաշից դուրս են գալիս այդ կրօնապետին մի աւելորդ յարգանք մատուցանելու համար։ Ամեն մի մահմեդական անչափ պատիւ կը համարի իրան եթէ շէյխը բարեհաճի գոնէ մի զիշեր նրա կնոջ մօտ անցկացնել... Ռրանով նրա սերունդը կը սրբագործւի կամ նրա չը բեր՝ կինը բերող կը դառնայ։ Ամեն մի մահմեդական չի վստահանայ շէյխի ձեռքը, մինչև իսկ նրա շորը համբուրել, այլ շատերը իրանց երջանիկ են համարում երբ կարողանում են մերձենալ ու լիզել նրա ձիւ ծածկոցը, սանձն ու պոչը։ Նա պառփտ է անում իր թեմում շրջապատուած երկու երեք հարիւր ազնւական ձիաւորներով, իոյ երբ կանգ է առնում մի գիւղում կամ քարող խօսում— ամեն տեսակ երթևեկութիւն, սայլի ու անասունի անց ու դարձ, արգելւում է այնտեղում։ Երբ որ նա շփէ իր ձեռքով հայրաբար մի մարդու ծնոտները, այդ մարդը— լինի նա մահմեդական թէ քրիստոնեայ— համարւում է այնուհետև մի տեսակ կէս-կղերական անձնաւորութիւն, պարտաւորւում է թողնել մօրուք

ու վայելում մի յայտնի աստիճանի յարգանք իր շրջապատողներից։ Դրանք կուլում են սօֆի և իրաւունք ունեն շէյխի մասնաւոր ողորմածութեան։ Դրանք մի անսակ, եթէ կարելի է այսպէս ասել, հաջի, մահտեսի կամ մղզսիներ են։ Խիղանում կարելի է տեսնել մի քանի հայ սօֆիներու։

Խիղանը Կորդուաց լեռների առաջին մասումն է։ Աւելի լեռնական ու բիրտ կեանք են վարում նրանցից վերև ապրող հայերը՝ Մոկս, Շատախ, Սպարկերու, Դէհ ու Բոհաման գաւառներում։

Մոկսը արտադրում է լաւ մեղր, իւղ, խաղող, նուռ ու ծխախոտ։ Շատախը—հանրածանօթ գոյն գոյն ու սիրուն չալ։ Սպարկերաը—ընտիր ընկուզենու կոճղեր, որ մեծ քանակութեամբ ուղարկւում է Եւրոպա վանցի վաճառականների ձեռքով։ Այդ երեք գաւառը, շնորհիւ իրանց այդ արտադրութիւնների, բաւական բարեկեցիկ կեանք են վարում քան միւս երկուսը, որ Տաճկա-Հայաստանի ամենաաղքատ ու անբաղաքակիրթ տեղերից մէկն են։ Շատախը ծանօթ է նոյնպէս իւր հոշակաւոր Կաճեռ գիւղով, բացարձակ խենթերի այդ առաջնակարգ հայրենիքով ¹⁾։

Ի՞նչ՝ այդ կողմերի և թէ՛ Խիղանի քրդերի վարք ու բարքում նկատելի է մի շատ բնաւորոշ գիծ. նրանք պատկառում են հայ եկեղեցու հեղինակութեան առաջ ու երդւում նրա անունով...

Բայց այն, ինչ որ յայտնի է Սասնոյ լեռների (Մուշի մօտ) քիւրդերի մասին՝ գերիվերոյ է այդ հանգամանքից։

Այլ—հին ծագում ունեցող մի սուսնդութիւն ասում է, որ Սասունցի մի քիւրդ, Մշում եղած ժամանակ, մտնում է զւարճութեան համար՝ պատարագի միջոցին՝ մի եկեղեցի ու մի խումբ հայ գիւղացիների հետ «ճաշակ» վերցնում քահանայից։ Սակայն վախից նա այդ սրբութիւնը չէ կուլ տալիս, այլ ծածուկ հանում է և պահում մի փոքրիկ տուփում։ Սարը վերադառնալիս, առանց ոչոքին բան ասելու, նա դնում է այդ տուփը մի փեթակում ու հե-

¹⁾ Տես իմ «Կաճեռայ կուրը» Հանդէս գրականական և սրտամական բ. գրքի մէջ։

ռանում Գանի մի ամսից յետոյ, երբ նա մօտենում է փեթակին՝ այնտեղ լցւած մեղրը դադարկելու, նա հանդիսատես է լինում հետագայ տեսարանին. այնտեղ՝ ճիշդ թողած թփի տեղ՝ դուած է լինում մի մեղրի սկիհ, նորա մէջը՝ մեղրի նշխար՝ մեղրի թաշկինակով ծածկւած... Նա իր գլխին է հաւաքում ամբողջ գիւղը (բացառապէս քրդաբնակ), պատմում ու ցոյց տալիս ամենքին այդ սաստուածային գործը: Ամբողջ գիւղը՝ մի հոգի դարձած՝ կառուցանում է իսկոյն այդ փեթակի տեղը մի սիրուն եկեղեցի ու զարդարում նրան պէտք եղած պարագաներով: Այնուհետեւ ամեն անգամ, երբ դրանց կողմով մի հայ քահանայ կամ վարդապետ անցնի, նրանք հրաւիրում են այդ հոգեւորականին իրանց եկեղեցին, իսկ իրանք շարւում են դրօսում՝ չոքած նրա պատերի տակ: Քահանան ներսը մենակ պատարագ է անում և ապա դուրս գալով՝ երկու երկու նշխար է բաժանում քրդերին, որոնք փոխարէնը տալիս են նրան խիստ առատ աջահամբոյր:

Ի դէպ է աւելացնել այստեղ, որ այդ նշանաւոր հանգամանքը երբէք չէ արգելում Սասնոյ անառիկ լեռների հայ և քիւրդ բնակիչներին արիւնհահեղ պատերազմներ մղելու իրարու դէմ, պատերազմներ, որոնց զսպելու համար ահագին զօրագնդեր են ուղարկւում այնտեղ: